

# 標準 ê 5c.c.

► ■ 藍天中的飛魚 | 教會青年 ■

這幾日，阮兜兩個囡仔 lóng 喉嚨發炎、發燒、khuh-khuh 嗽，我 ê 另外一半 mā 全款「tiòh 獎」koh 加一個特別獎：「嚨喉 pū 膿」。Tī 一禮拜 ê 中間，阮每一日 lóng 去診所抑是病院報到，每一日 lóng 無全款 ê 人去看醫生，chah 真 chē 藥水 kap 藥粉轉來厝。

過去我家已食藥仔 ê 時，無論是藥水抑是藥丸，lóng kuh-lu kuh-lu 就 kā 伊吞--落-去，m̄ 管藥水是有對 tiòh 藥杯仔 ê 線抑是無，藥丸數有算 tiòh-- 無。有時陣我 tih 想，bat tī 實驗室上課-- 過、實習-- 過 ê 我，應該 ài 特別注意數量 kap 精準度 chiah tiòh，哪會 chit-má 食藥仔 hiah-nī 無謹慎、無注意？

這個問題一直到我 kā 囡仔飼藥仔 ê 時陣，我 ê 另外一半 mā 看 tiòh 我 ê 問題，koh 提醒我 tiòh-ài 注意 ê 所在。一開始伊看我 thìn 藥水 ê 時，感覺真奇怪，是按怎我 kā 藥杯仔 teh 起來 khng tī 目矙頭前 teh 看，m̄ 是 khng tī 桌仔頂。明明藥袋仔頂寫「5 c.c.」，總--是我所 thìn-- 出來 ê 藥仔 tih-beh 6 c.c.。伊理所當然想講學過化學實驗 ê 人應該會 khah 注意、khah 頂真，哪是用這款真容易錯誤 ê 方式（會 chhu-chhu，koh

照家已 ê 想法來 sóa 杯仔 ê 方向）tih thìn 藥仔？學習科學方式 ê 人，對數字、數量應該比別人 koh-khah 要緊、有敏感度，總--是我 soah chhin-chhin-chhái-chhái，感覺 5 c.c. kap 5.5 c.c. 差無 jōa-chē。

雖然我感覺差一點點仔無要緊，因為 m̄ 是 tih 做實驗，並無爆炸抑是發生危險。而且我只是加抑是減零點幾 c.c.，無啥麼要緊，何況囡仔若是無完全 kā 藥仔食-- 落-去，án-ne kám m̄ 是 kap 我 ê 藥水量加減差不多。總--是我 ê 先生 hō 我一個真好 ê 模範：伊將藥杯仔 khng tī khah kōan ê 桌仔頂，m̄ 免 à" 身軀，就thang真清楚看 tiòh 藥杯仔頂 ê 刻度，án-ne 所 thìn-- 出來 ê 藥量chiah 才是標準 ê 5 c.c.。

別人看 tiòh 先生 án-ne thìn 藥仔 ê 方式，mā bat 笑過伊 hiah-nī 慙，差一點點仔無要緊，m̄ 免 hiah-nī 要緊。總--是我 ê 先生真認真 kā 伊講，因為阮囡仔 ê 身軀無需要 hō 人做無必要 ê 實驗，若是會使，我盡量 hō 伊正確 ê 藥量，thang 得 tiòh 醫好、恢復健康。

這個代誌 hō 我一個提醒：有時咱認為無要緊 ê 代誌抑是方式，soah 真容易 hō 咱疏忽、

chhìn-chhái。有時因為 án-ne ê 疏忽，造成真大 ê 困擾 kap 傷害。無論 tī 醫學上 ê 危險（針頭無處理好、藥物過量、開 m̄-tiòh 藥仔、寫 m̄-tiòh 人 ê 名），抑是咱 ê 生活上（kā 囡仔留 tī 厝內、車內幾分鐘，滾水無隨禁、燒湯無 khng khah kôan ê 所在、尖尖 ê 刀仔無 khng 好、門窗無鎖、無看青紅燈……）這 lóng 有可能造成性命 kap 生活頂 ê 危險性。

Tī 咱 ê 信仰頂面，咱 ê 標準就是上帝，上帝 tī 聖經所啟示咱遵守 ê 律法、命令，咱 tiòh 遵守、記 tī 心內。若無，遇 tiòh 試探 kap 引誘 ê 時，咱就真容易感覺無要緊、攞會使、一遍就好、後遍 bē--a。若是 án-ne，就無 chhái 上帝將一切 ê 智慧 kap 奧妙向咱啟示，hō 咱耶穌基督做模樣、拯救，hō 咱聖神做咱 ê 保惠師，引 chhōa 咱行人生 ê 路。咱 tiòh 真注意將上帝 ê 話記 tī 心，koh 行 tī 咱 ê 生活頂面。

希望咱健康，無需要食藥仔。總--是若是有機會用 tiòh 藥杯仔 ê 時，請你會記得將藥杯仔 khng tī khah kôan ê 桌仔頂，是平平 khng tī 目矙前，hō 你方便 thn 藥水，koh thang thn 正確 ê 量 ê 藥水來食，hō 你 ê 身體得 tiòh 健康、醫治。若是 tī 遇 tiòh 「chhìn-chhìn-chhái-chhái」ê 試探 ê 時，咱 tiòh-ài 勇敢拒絕，m̄-thang 跋落去「無要緊」ê 陷阱中間。

願咱過一款標準 ê 基督徒生活，咱 ê 思想、觀念、生活方式、對待--人 ê 態度、服事 ê 態度 lóng 對向咱 ê 上帝，hō 咱無行 m̄-tiòh 路、做 m̄-tiòh 代誌、講 m̄-tiòh 話、khng m̄-tiòh 目標，得 tiòh 上帝 ê 謳嘞，是一個標準 ê 5 c.c. ——跟 tòe 主腳步 ê 人。

# 德生 松年大學 (七字仔)

■ Iâu Chì-liông 姚志龍 | 台文工作者 ■

德生松年第一好  
學校拍拚人 o-ló  
序大大家認真學  
事事項項 lóng khe 考

身體健康上可靠  
放下世事免操勞  
趁 jōa-chē 錢lóng tú 好  
知足 ták 日笑 ho-ho

心無束縛上輕可  
七十 iáu m̄ 是阿婆  
下課順續遊愛河  
夕陽真正上美好

上課用心聽就好  
看序細teh變啥寶  
個個 (kô-kô) 身藏獨門寶  
有機會換我kòng羅